

# Pablo lelpox carta Galacia tʉajɲɛpijiwliajwa

---

## Pablo lelpox carta Galacia tʉajɲɛpijiwliajwa, Jesús pejwɲajan naexasitiliajwa

**1** Xan, Pablo, Jesucristo namakafit apóstolliajwan potʉajɲɛ-cha jiw naewɲajɲaliajwan japon pejwɲajan. Jesús tɛp wɛt, pax Dios mat-echpon pejme dukaliajwa. Do jawɛt, Dios xan namakafitbej apóstolliajwan. Jiw nato'a-el. Japi jiw xan namakafis-el naewɲajɲaliajwan Jesús pejwɲajan. **2** Lelx ampox carta xamal, Jesús pejwɲajan naexasitampimliajwa, Galacia tʉajɲɛpijwamliajwa. Puexa xanxotpi, naexasiti Jesús pejwɲajan, japi, xan sɛapich, saludos xato'a xamalliajwa. **3** Xan kawɲajɲax waj-ax Dios, wajpaklon Jesucristobej, xamal kajachawaes-liajwapi, chiekal duilaliajwam, asew jiw sɛapich. **4** Waj-ax Dios, japon to'a Jesucristo pajut natapaeliajwa asajiw boesaliajwas, nakwemosliajwa xatis babijaxan isaspoxanliajwa. Samata, Dios nakkajachawaesaxael Jesús pijaxtat babijaxan isasamatas, me-ama asew jiw babijaxan isful ampamatkoiyantat, jachisamatas xatis. **5** Samata, xatis pomatkoicha jɛmchiyaxaes Diosliajwa: “¡Xam xabich pachaemam!” —chiyaxaes. ¡Jasox nej ja-aeché! Diosliajwa!

## Kaes asawɲajan ajilpox, me-ama Jesús pejwɲajan Dios jiw bɛ'weliajwa

**6** Dios xamal nejxasink xot, tadɛt bɛ'weliajwa. Samata, xamal naexasitam Jesús pejwɲajan. Do jawɛx, piacha-el wɛt, wɛltaenx xamal kofasiampox naexasitampox Jesús pejwɲajan. Samata, amwɛtjel xan xabich nejchaxoelx xamalliajwa, asawɲajan asbɛan jɛmch naexasisiasiam xot. **7** Diachwɲajɲakolax xan jɛm-an. Jiw chiekal naexasit wɛt Jesús pejwɲajan, ja-aech wɛt,

Dios bu'weyaxaesi. Kaes asawuajan ajil, me-ama japawuajan Dios bu'welijwa jiw. Asew jiw pat xamalxot naewuajnalijwa asawuajan, xamal naexasisfula-elalijwam majt xan naewuajnaxpox, kaenejchaxoelaxa-elalijwam, xanal suapich. Japi jiw asaxantat xaliaxasiapi chimiawuajan, Jesús pejwuajan, Jesús ispoxanlijwa. **8** Xanal naewuajnax chimiawuajan, Jesús pejwuajan. Japawuajan naexasitam wut, Dios xamal bu'weyaxael. Xanal xaliaxaxinil Jesús pejwuajan. Kaen ángel pask wut, japonbej xaliaxaxil japawuajan. Asew jiwbej japawuajan xaliaxaxil. Asan aton asawuajan naewuajan wut, Jesús pejwuajana-elpox, japon aton Dios xabich kastikaxaes pomatkoicha infiernoxotdik. **9** Majt jum-anpox pejme xamal jumchiyaxaelen. Xamalxot asan aton naewuajan wut asawuajan, Cristo pejwuajna-el wut, xamal majt naexasitamwuajna-el wut, ¡Dios xabich kastikaxaes japon aton pomatkoicha infiernoxotdik!

**10** Jiw naewuajnax wut Jesús pejwuajan, naewuajna-enil jiw asbuuan jumch nejhachaemlaliawwa xanlijwa. Xan naewuajnax japawuajan Dios nejhachaemlaliawwa xanlijwa. Naewuajnaxaelen wut asawuajan, Cristo pejwuajna-elpox jiwkal nejhachaemlaliawwa xanlijwa, jachiyaxaelen wut, kaes Cristo pamaknaxinil.

### **Pablo Dios makafichpox apóstolliajwa**

**11** Takoew, xan nejxasinkax xamal chiekal matabijalijwam, Dios bu'weyaxaelpox Jesús pejwuajan naexasiti. Xan jiw naewuajnaxpox, Jesús pejwuajan, japawuajan jiw pajut faena-el. **12** Jesucristo pejwuajan majt chinax kaen aton nachapae-el xan matabijsliawwan. Jesucristo xan natapaei matabijsliawwan japon pejwuajan.

**13** Xamal nawultaenam, ma-an xan majt naexasitx wut Moisés chajia lelpox. Me-ama asew judíos, xanbej ja-an. Xamal nawultaenam, ma-an xan, chakinanuamtax wut Jesús pejwuajan naexasiti, jaelalijwan wut. Japi jiw chinax beltae-enil. Ja-an xan japi jiw chiekal toesliawwanlach. **14** Moisés chajia lelpox naexasitx wut, xan xabich kaes pejme xentax japoxliawwa. Me-ama asew judíos, kaewutje najupati'taxpi, xan jachi-enil. Xan, me-ama tajwuajnapijiw, ja-an japoxliawwa. **15** Xan nalaels-enil wutfuk, Dios nabeltaen xot, namakafit japon pijax bichax nabichliawwan. **16** Samata, baxael, Dios pijaxtat chiekal

matabijtax Jesús, Dios paxulanpon, xan naewuajnalijwan japon pejwujajan judíos-elpi, japibej Dios bu'welijwas. Jesús pejwujajan matabijtax wut, xan fulae-enilde chinax kaen aton poxade wuajnaemsliajwan. Jumchi-enil: “¿Machiyaxaelenkat xan?” —chi-enil. 17 Fulae-enilbej Jerusalén paklowax poxade taeliajwan apóstoles wuajnaemsliajwan. Japi matxoela-apóstolespi, xan apóstola-enil wutfuk. Xanlax fulaechx Arabia tuajnu poxade. Do jawux, Arabia tuajnu xotx wut, baxael, Damasco paklowaxxot nawia'nax.

18 Nawia'nax wut, xan dukx tres waechan Damasco paklowaxxot. Do jawux, xan fulaechx Jerusalén paklowax poxade Pedro taeliajwan, japon apóstolpon, xan matabijsliajwan. Japonxotx kolesemana. 19 Jerusalén paklowaxxot kaes asew apóstoles tae-enil. Kaen Santiago taenx, japon wajpaklon Jesús pakoewan. 20 Xan lel xpo x Dios chiekal matabijt, diachwuajnakolaxpox.

21 Do baxael, Jerusalén paklowaxxot chijian wut, fulaechx Siria tuajnu poxade, Cilicia tuajnu poxadebej. 22 Japamatkoitat Judea tuajnu pijiw, Jesús pejwujajan naexasiti, japi xan chiekal namatabija-elfuki. 23 Judea tuajnu pijiw jumtaen asew jiw jum-aechpox xanliajwa: “Pablo, japon majt nakchakinanumt xabich naktoesliajwa, Jesús pejwujajan naexasich xot, amwutjel japonbej Jesús pejwujajan naexasit. Japon asew jiw naewuajnafulbej Jesús pejwujajan japi jiw naexasisliajwa japawujajan” —aech japi jiw xanliajwa. 24 Samata, Judea tuajnu pijiw, naexasiti Jesús pejwujajan, japi Dios kawujajan wut xanliajwa, jum-aechi: “Dios, xam xabich mamnikam! xam nijaxtat Pablo naexasit naxulan Jesús pejwujajan!” —aechi, Dios kawujajan wut xanliajwa.

### Asew, apóstoles, chiekal bu'kulapox Pablo

**2** Catorce waechanwux, xan pejme kaxa fulaechx Jerusalén paklowax poxade. Jawut xan fulaechx, Bernabé suapich. Bu'folxbej Tito. 2 Xan fulaechx Jerusalén paklowax poxade, Dios nato'a xot. Jerusalén paklowax patx wut, natameja Jesús pejwujajan naexasiti, japi paklochow. Do jawut, paklochow chiekal chanaekabuanax judíos-elpi naewuajnaprox. Xan ja-an paklochow jumchisamata xanliajwa: “Pablo naewuajnaprox, chimiawujajan, Jesús pejwujajan, judíos-elpi naexasisliajwa, japox chiekal pachaema-el” —chisamata

paklochow xanliajwa. **3** Paklochow jumtaen wut judíos-elpi naewhajna xrox, japi paklochow xabich nejchachaemil. Tito, tajnachalanpon, japon judíos-atona-el. Pe paklochow jumchi-esal japonliajwa: “¡Titobej nej circuncidas Dios pejmarkaxliajwa, chiekal naexasisliajwa Moisés chajia lelpox!” —chi-esal Titoliajwa. **4** Asew judíosxot, me-ama Jesús pejwujajan naexasit wut, ja-aechi. Japi xanalxot pat asbuan jumch naewesliajwa, natasalaliajwabejpi, chiekal naexasis-enil xot puexa Moisés chajia lelpox, xanal amwutjel chiekal naexasitx xot Jesús pejwujajan. Japi jiw xanal nato'a pejme naexasisliajwan puexa Moisés chajia lelpox. **5** Japi xanal nato'apox naexasis-enil. Samata, xanal to'a-enil xamal naexasisliajwam Moisés chajia lelpox. Xamallis chimiawujajan, Jesús pejwujajan, naexasitam pejme pachaemaliajwam Diosliajwa. Japawujajan diach chiekal wujajnakolax. Samata, xanal nejxasinka-enil japawujajan xaliaxaliajwan.

**6** Jesús pejwujajan naexasiti, paklochow, chapaeix wut xan naewhajna xroxan judíos-elpiliajwa, japi paklochow xan najumchi-el: “Japi jiw naewhajnam wut Jesús pejwujajan, xam wewe'pfuk kaes asax japi chiekal naewhajnalialjwam” —nachi-el paklochow. Xan nejchaxoela-enil paklochow nejchaxoelpoxanliajwa, puexa xatis chiekal najups xot Diosliajwa. **7** Japi paklochow nakaewa najum-aech xanliajwa: “Diachwujajnakolax Pablo Dios to'as naewhajnalialjwa judíos-elpi, Dios bu'weliawwasbej japi jiw. Me-ama Pedro Dios to'as naewhajnalialjwapon judíos, jatisbej Pablo” —aech paklochow nakaewa xanliajwa. **8** Pedro Dios makafich apóstollialjwa, japon naewhajnalialjwa judíos. Xanbej Dios namakafit apóstollialjwan naewhajnalialjwan judíos-elpi.

**9** Samata, Santiago, Pedro suapich, Juanbej, japi paklochow Jerusalén paklowaxxot naexasitpiliajwa Jesús pejwujajan, japi pajut chiekal matabija Dios xan namakafitpox naewhajnalialjwan judíos-elpi. Samata, japi xanal chiekal nakijacha, kaenejchaxoelax xoti, xan, Bernabé suapich, naewhajnalialjwan judíos-elpi Jesús pejwujajan. Santiago, Pedro suapich, Juanbej, japilax naewhajna xael judíoska Jesús pejwujajan. **10** Japi paklochow asbuan jumch nato'a xanal nejkiowasamatan kijila kajachawaesfulaxrox. Pelis xanal kajachawaesfulax kijila.

### **Pablo lotpox Pedro Antioquía paklowaxxot**

**11** Pedro Antioquía paklowaxxot wət, xan jiw pejwəajnalel japon chiekal jəm-an, is xoton isaxilpox. **12** Pedro majt naxael, judíos-elpi sʷapich, koft xoton wajwəajnapijiw fiatpox. Samata, Pedro nejmach jixaelpon, judíos-elpi sʷapich, japi naexasiti Jesús pejwəajan. Pe Santiago pejjiw pasax taen wəton Antioquía paklowaxxot, Pedro japi wəajna nakolt judíos-elpixot. Nakoft-bejpon, japi sʷapich, naxaelpox. Ja-aech Pedro, pejlewla xot Santiago pejjiwliajwa. Santiago pejjiw jəm-aech: “¡Judíos-elpi, naexasiti Jesús pejwəajan, japi nej circuncidas, me-ama xatis judíos, jachiliajwa!” —aech Santiago pejjiw. **13** Asew judíos, naexasiti Jesús pejwəajan, Pedro nakolsax taen wət, japibej nakola judíos-elpi pejbaxot. Bernabébej nakolt jaxot. **14** Xan japi taenx wət naexasis-elpox Jesús pejwəajan to'apox, jawət xan puexa jiw pejwəajnalel, jəm-an chiekal Pedroliajwa: “Xam Pedro, diachwəajnakolax chiekal judíos-atonam. Pe xam, judíos-atona-emil wət, ja-am. Ja-am wət, ¿ma-aech xotkat to'asiam judíos-elpi duilaliajwa, me-ama xatis judíos?” —an Pedroliajwa.

### **Judíos, judíos-elpibej, naexasit wət Jesús pejwəajan, japi Dios bʷəwəyaxaespoX**

**15** Xanal diachwəajnakolax judíosjiwan, taj-axjiw judíosjiw xot. Samata, xanal chiekal matabijax Moisés chajia lelpox. Me-ama judíos-elpi, matabija-el Moisés chajia lelpox, xanal judíosnanpin jachi-enil japoxliajwa. **16** Xanal chiekal matabijax, Moisés chajia lelpox chiekal naexasisaxinil chiekal pachaemaliawwan Diosliajwa. Pelax Jesucristo pejwəajan naexasitx wət, ja-an wət, chiekal bʷəwəajanjilaxaelen Diosliajwa. Samata, xanal naexasitx Jesucristo pejwəajan Dios nabʷwəliajwa. Samata, xanal bʷəwəajanjinil Diosliajwa. Bʷəwəajanjila-enil Diosliajwa, naexasitx xot Moisés chajia lelpox. Chinax kaen aton puexa chiekal naexasisaxil Moisés chajia lelpox bʷəwəajanjilaliajwa Diosliajwa.

**17** Amwətjel xanal Jesucristo pejwəajan naexasitx Dios nabʷwəliajwa. Ja-an wət, asew judíos najəmchiyaxael xanalliajwa: “Xamal babijaxan isam, kaes naexasis-emil xot Moisés chajia lelpox” —chiyaxaeli xanalliajwa. Xanal Jesús

pejwúajan naexasitx wút, ¿xanalkat isx babijax, kaes naexasis-enil wút Moisés chajia lelpox? ¡Diachwúajnakolax xanal is-enil babijax! **18** Xan jiw jum-an wút: “Moisés chajia lelpox nakwewe'pa-el naexasisliajwas” —an wút, do jawux, pejme jiw to'ax wút naexasisliajwapi Moisés chajia lelpox, xan ja-an wút, tajbú'wúajnaaxaelen Diosliajwa. **19** Xan chiekal matabijtax wút Moisés chajia lelpox, jawút tajut matabijtaxbej chiekal naexasisaxinilpox japoxan. Samata, xan koftax naexasitxpoX Moisés chajia lelpox Diosliajwa chiekal pachaemaliajwan. Amwútjel naexasitx Jesús pejwúajan. Samata, chiekal pachaemx Diosliajwa. Cristo túp wút cruztat, jawútbej, xan, me-ama túpX cruztat, Cristo suapich, ja-an Diosliajwa. **20** Amwútjel, xan dukx wút, nejchaxoela-enil tajut isasianpoxan isfulaliajwan. Amwútjel, dukx wút, Dios paxulan chiekal xanaboejsfulax japon nakajachawaesfulaliajwa. Japon nanejxasink xot, pajut natapaei asajiw boesaliajwas, tupaliajwapon xanliajwa. **21** Xan nejwesla-el Dios nanejxasinkpox. Jiw chiekal naexasisaxael wút Moisés chajia lelpox japi jiw chiekal pachaemaliajwa Diosliajwa, ja-aech wút, Cristo tuppox masox chiekal namanaxael.

### **Amxot jum-aechpox Moisés chajia lelpoxliajwa, Abraham chiekal Dios xanaboejtpoxliajwabej**

**3** Xamal, Galacia túajnúpijwam, ¡nejliaklawam! ¿Ma-aech xotkat tapaeiam asew jiw xamal naekichachajbaliaw kofaliajwam naexasitampox, diachwúajnakolaxpox? Chajia xamalxotx wút, chiekal naewúajnax Jesús cruztat kimatamatlaspox. ¿Xamalkatlis japox chiekal nejkiowam? **2** ¡Xamal ampox, wúajnachaemsaxaelenpox, chiekal najumno'e! ¿Xamalkat nejmatpúatantat Espíritu Santo, naexasitam wút Moisés chajia lelpox? ¡El! Espíritu Santo nejmatpúatantat, xamal naexasitam xot Jesús pejwúajan. **3** Diachwúajnakolax xamal nejnejchaxoelaxan pawe-ajil. Túaduam wút naexasitampox Jesús pejwúajan, Espíritu Santo xamal kajachawaet. Amwútjel xamal nejchaxoelam najut nijaxtat duilaliajwam Cristoliajwa, hasta túpam wút. **4** Xamal majt nabijatam, asew jiw babijaxan is wút xamalliajwa, Jesús pejwúajan naexasitam xot. Ma amwút, kofam wút Jesús pejwúajan naexasitampox, ja-am wút, majt chajia nabijatampox, naexasitam wút Jesús pejwúajan, japox omjilaxael xamalliajwa. **5** Dios to'ak Espíritu Santo xamal

nejmatpuatanxotaliajwa. Dios isbej koechaxan xamalxot. ¿Ma-aech xotkat Dios japoxan is xamalliajwa? Dios is japoxan, xamal Jesús pejwúajan chiekal naexasitam xot. Japoxan is-elpon, xamal naexasitam xot Moisés chajia lelpox.

**6** Abraham chiekal naexasit Dios jumtispor japonliajwa. Samata, Abraham chiekal pachaempon Diosliajwa. **7** Samata, xamal chiekal matabijam! Abraham pamojiwkola, japi-lap chiekal Dios xanaboejapi. **8** Dios pejjamechan, chajia lelspor, jum-aech wut, jum-aechox judíos-elpiliajwa. Japibej chiekal Dios xanaboeja wut, babijaxan isporan wejilaxaespi. Japox chimiawúajanliajwa Dios jum-aech Abrahamliajwa: “Potúajñuchanpijw xan kajachawaesaxaelen xam nijaxtat” —aech Dios Abrahamliajwa. **9** Samata, Dios kajachawaesaxael puexa jiw, japi chiekal Dios xanaboejapi, me-ama chajiakolaxtat Dios kajachawaet Abraham, japon xanaboejt wut Dios.

**10** Aton pajut nejchaxoel wut, jum-aech wuton: “Diachwúajnakolax xan Dios nabu'weyaxael, Moisés chajia lelpox naexasitx xot” —aech wuton, japon aton Dios kastikaxaes, chiekal puexa naexasis-el xoton Moisés chajia lelpox. Japon aton japox wejachiyaxaes, Dios pejjamechan, chajia lelspor, jum-aech wut, jum-aech xot: “Aton chiekal naexasis-el wut puexa Moisés chajia lelpox, japon aton Dios kastikaxaes” —aech xot Dios pejjamechan. **11** Samata, xatis chiekal matabijas. Diachwúajnakolax aton mason namanaxil bu'wúajanjilaxtat Diosliajwa, puexa chiekal naexasis-el wuton Moisés chajia lelpox. Dios pejjamechan, chajia lelspor, jum-aech wut, jum-aechox: “Jiw chiekal xanaboeja wut Dios, ja-aech wut, japi jiw bu'wúajanjilaxael Diosliajwa. Samata, japi jiw pomatkoicha duilaxael Diosxotse” —aech Dios pejjamechan, chajia lelspor. **12** Jiw nejchaxoeli naexasisliajwa Moisés chajia lelpox, japi jiw xanaboeja-el Dios bu'weliawas. Dios pejjamechan, chajia lelspor, jum-aech wut, jum-aechox: “Jiw chiekal pachaemasiapi Diosliajwa, naexasit xoti Moisés chajia lelpox, japi jiw chiekal naexasisaxael puexa Moisés chajia lelpox” —aech Dios pejjamechan, chajia lelspor.

**13** Moisés chajia lelpox puexa xatis chiekal naexasis-esal xot, Dios puexa xatis nakkastikaxael. Pe ja-aech wut, Cristo cruztat tıp xatisliajwa. Jawut nakwemoton xatis babijaxan isaspoxanliajwa Dios nakkastikasamata. Dios pejjamechan,

chajia lelspx, jum-aech wut, jum-aechox: “Aton naetat duch tɔpaliajwa, Dios kastikas xot” —aechox. **14** Cristo tɔp xatis nakbɔ'weliajwa. Samata, Dios kajachawaesaxael judíos-elpibej, me-ama Dios jum-aech Abrahamliajwa. Dios jum-aech xatis Jesús pejwɔajan naexasichpisliajwa, Espíritu Santo nakchaliajwa, nakkajachawaesliajwabej.

**Amxot jum-aechpox Moisés chajia lelpoxliajwa,  
Dios chajia jumdutpoxbej Abrahamliajwa**

**15** Takoew, xamal ampox jumchiyaxaelen. Kaen aton jumdut wut nabichliajwa contrato asan atonliajwa, jaxot lelon isliajwapoxan contratofutat. Do jawut, contratofutat pejwɔl lelon. Pejwɔl lel wut, kaes asax pejme isliajwa lelaxilon. Japon aton chiekal toesaxael japox bichax, me-ama contratofutat jum-aech. **16** Dios jumdutpox Abrahamliajwa, kaen Abraham pamonliajwabej. Dios jumdutpox, japox, me-ama contrato wut, ja-aechox Diosliajwa. Dios japox jumdut wut, jumdus-elon puexa Abraham pamojiwliajwa. Dios japox jumdut kaen Abraham pamonliajwa, japon Cristoliajwa. **17** Xan jum-anpox xamal chiekal chanaekabɔanaxaelen. Chajiakolaxtat Dios jum-aech Abrahamliajwa asamatkoi jachiyaxaelpoxliajwa. Dios japox jum-aech wut, do jawɔx, cuatrocientos treinta waechan toep wut, japamatkoiyan Dios kito'a Moisés lelaliajwa Dios jum-aechpoxan Abraham pamojiwliajwa, japi israelitasliajwa, japox naexasisfulaliajwapi. Ja-aech wut, Dios jumdutpox Abrahamliajwa amwɔtjel nakiowa ja-aechfukox. Japox toepa-elfuk. Asamatkoi, Dios jum-aechpox diachwɔajnakolax chiekal jachiyaxael. **18** Dios jumdutpox Abrahamliajwa, japox malech Dios kajachawaesliajwa Abrahamliajwa. Japox diachwɔajnakolax jachiyaxael asamatkoi, Dios malech nakkajachawaesaxael wut xatis. Pelax Moisés chajia lelpox naexasisaxaes wut, Dios jumdusaxil malech nakkajachawaesaxaelpoxliajwa.

**19** ¿Ma-aech xotkat pachaem Moisés chajia lelpox? Dios chaxdut pejtato'lxan puexa jiw pajut chiekal matabijaliajwa, is wut babijaxan. Moisés chajia lelpox fiat jiw babijaxan isasamata. Moisés lelpox, jiw chiekal naexasisfulaliajwa, hasta Abraham pamon pask wut. Pasaxaelpon, japon Cristo, Dios to'aspon. Dios pajut kito'a-el Moisés japox lelaliajwa. Dios to'alax pej-ángeles japi jumchiliajwa Moisés. Do jawɔx, Moisés jum-aech



israelitasliajwa ángeles jum-aechpox japonliajwa. Lelbejpon japox. **20**Dios jumdut wut isaxaelpox Abrahamliajwa, Dios pajut chiekal jum-aech Abrahamliajwa. Jawut Dios asan baxto'a-el, Abraham jumchiliajwa wut.

### Ma-aech xot pachaempox Moisés chajia lelpox

**21** Moisés chajia lelpoxxot jumchi-el: “Pachaema-el Dios jumdutpoxan” —chi-elpox. Kaes pejme asax ajil, Dios tato'alpox, jiw chiekal naexasisliajwa pomatkoicha jiw duilaliajwa Diosxotse. **22** Dios pejjamechan, chajia lelpox, jum-aech wut, jum-aechox: “Puexa ampathatpijiw babijaxan isla-ele-el” —aechox. Samata, wajut chiekal matabijas. Jesucristo pejwujajan naexasiti, japi Dios chaxduiyaxaes jumduchpox.

**23** Jesús pasax wujajna, japamatkoian, xanal judíos naexasisfulax xot Moisés chajia lelpox, me-ama esclavos wut, ja-an japawujajanliajwa. Pe xanal chiekal naexasis-enil Moisés chajia lelpox. Ja-an wut, Jesucristo xanaboeja-enilfuk Dios nabu'welija. **24** Me-ama yamxi tataeflan, naewujajan yamxi babijaxan isasamata, ja-aech Moisés chajia lelpox. Moisés chajia lelpox xanal nanaewujajan babijaxan isasamatan. Samata, Cristo nalaelt wut, baxael, tujon puexa xatistliajwa. Xatis naexasich wut Cristo pejwujajan, jatis wut, xatis babijaxan isaspoxan Diosliajwa chiekal nakwe-ajil. **25** Amwutjel xatis chiekal xanaboejas Dios nakbu'weyaxaelpox, Cristo tuj xot xatistliajwa. Samata, kaes nakwewe'pa-el naexasisliajwas Moisés chajia lelpox. **26** Xamal Jesucristo pejwujajan naexasitam xot, Dios xamal beltaen babijaxan isampoxanliajwa. Samata, amwutjel xamal puexa Dios paxim. **27** Xamal bautisa wuti, asew jiw matabija xamal-bej Cristo pejjiwampox. Ja-am wut, xamal nejchaxoelam: “Xan chiekal dukasian, me-ama Cristo, jachisian” —am, nejchaxoelam wut. **28** Xatixot asew judíos, asew judíos-elpibej. Asew esclavos, asew esclavos-elpibej. Asew poejiw, asew watho'bej. Puexa xatis Jesucristo pejwujajan naexasich. Samata, xatis, me-ama kaemuch wut, jatis Diosliajwa. **29** Xatis Cristo pejjiws wut, jatis wut, Abraham pamojiwsbej. Samata, Dios nakchaxduiyaxael Abraham chajia jumduchpoxan.

**4** Xan kaes amwut jumchiyaxaelen Moisés chajia lelpoxliajwa, Dios jumdutpoxan Abrahamliajwabej. Kaen kimaeyan puexa pejew naetuj wut, paxulan jam wutfuk, japon kamta

pax pejew chaxduiyaxisalfuk. Baxael, japon chiekal ti't wut, pax pejew chaxduiyaxaeson pejewliajwa. Japon jam wutfuk, me-ama esclavo wut, ja-aechon, naexasisful xot tataeflasi. **2** Japon ti's-el wutfuk, asew tataeflas. Wetataeflasbejpon pejwaxaelpi. Asamatkoi, japon ti't wut, pax jum-aechmatkoi pat wut, japamatkoi pax pejew puexa chaxduiyaxaeson. **3** Jatisbej majt xatis. Me-ama yamxuchas wut, jatis, chiekal matabija-esal xot Jesucristo pejwujajan. Xatis majt, me-ama esclavos wut, jatis. Xatisbej isas babijaxan, ampathatpijiw ispoxan. **4** Pat wut Dios markpox, matkoi, Dios to'ak paxulan nalaelsliajwapon kaeow judíos-atowtat. Nalaelt wut, baxael, chiekal ti'sful wutbejpon, japon naexasisful Moisés chajia lelpox. **5** Xatis xajupa-esal chiekal naexasisliajwas Moisés chajia lelpox. Samata, Dios paxulan fuloek nakwemosliajwa xatis babijaxan isaspoxanliajwa, xatis pejme chiekal pachaemaliajwas Diosliajwa. Samata, amwutjel xatis Dios paxis. **6** Dios to'ak Espíritu Santo wajmatpuatanxotaliajwa wajut chiekal matabijaliajwas Dios paxispox. Samata, xatis jūmtis Espíritu Santo pijaxtat Dios nakjūmtaeliajwa: “Taj-ax Dios” —tis. **7** Amwutjel xamal Dios paxim xot, esclavos-emil, isfula-emil xotlis ampathatpijiw isfulpoxan. Samata, asamatkoi Dios xamal chaxduiyaxael xabich pachaempoxan.

**Pablo xabich nejchaxoelpox Galacia tuajnupijiw,  
Jesús pejwujajan naexasitiliajwa**

**8** Xamal majt Dios matabija-emil wut, brixtat nuilam ídolos kawujajnalijwam. Xamal chiekal matabija-emil xot, nejchaxoelam: “Japi ídolos nakajachawaesaxael” —am, nejchaxoelam wut. Pe ídolos Dios-el. **9** Amwutjel xamal chiekal Dios matabijam. Pe Dios kaes pejme xamal chiekal matabijton. ¿Ma-aech xotkat kofasiam Dios naexasitamox? ¿Ma-aech xotbejkat pejme naexasisasiam Moisés chajia lelpox, Dios xamal bu'welijwa? **10** Xamalbej napatam, judíos pejmatkoi pat wut, napatamatkoi. Judíos fiestan is wut, xamalbej fulaemch japafiestan taelijwam. Xamal ja-amfulam, fiestamatkoi wut, fiestajuimt wutbej, fiestawaechan wutbej. Japafiestan xamalbej naktaenam wut, nejchaxoelam: “Dios nejchachaemlaxael xatisliajwa, ampafiestan naktaens xot” —am xamal, nejchaxoelam wut. **11** Samata, xan nejchaxoelx xamalliajwa: “Xabich

naewuajnaprox japixot, bej nawenafo'abej” —an, nejchaxoelx wut xamalliajwa.

**12** Takoew, xamal jum-an ampox. Xamalbej, me-ama xan, ¡ja-amde! Xan judíosnan, xamal judíos-emilpimxot xan dukx wut, me-ama xamal, judíos-emilpim wut, xan ja-an. Xamal babijax nawe-is-emil. ¡Amwutjelbej ja-amde! **13** Xamal chiekal matabijam. Xan bu'xaenkax wut, majt xamalxot patx. Jawut nakiowa, xamal naewuajnapx Jesús pejwuajan Dios xamal bu'weliajwa.

**14** Jawut, waxae nawaet wut, xan xabich kabuanchaemilan waxaetat. Pe nakiowa, xamal xan nanejxasinkam. Nato'a-emilbej asatujnulel. Najut xamal chiekal xan nabuk'ulam. Me-ama Dios pej-ángel, Jesucristobej, chiekal bu'kulaxaelam wut, xamal ja-am xanliajwa. **15** ¿Ma-aech xotkat amwutjel nejchachaemla-emil xanliajwa? Xan naewuajnapx wut Jesús pejwuajan, xamal majt chiekal xan nanaewetam. Jawutbej xabich nejchachaemlam. Japamatkoi xamal wuljowx wut, nejmach bej nachaxdusa-xaelambej wuljowxprox, xabich nasiowlapox. **16** ¿Pe xankat amwutjel xamalliajwa, me-ama nadaelmanan wut, jakabuankat xamalliajwa, naewuajnapx xot diachwuajnakolaxwuajan?

**17** Asew jiw xamalxot, japi xamal naewuajnasia circuncidaliajwam. Japi, me-ama xamal kajachawaesasia wut, ja-aechi. Pe japi kajachawaesaxaelprox pachaemaxil xamalliajwa. Japi nejxasink xanalxot xamal nadijaliajwam, xamal japi pejiwaliajwam. **18** Pachaemaxael, japi is wut pachaempoxan, kajachawaet wutbejpi xamal. Pomatkoicha xamal kajachawaesasia wut, japox pachaemaxaelbej. Pe japi xamal asbuanch jumch kajachawaesasia, xan xamalxotx wut. **19** Xamal, me-ama taxi wut, ja-am xanliajwa. Atow naxuwllaliajwa wut, xabich, nejchaxoelaful. Xanbej xabich nejchaxoelx xamalliajwa. Jansfulax, hasta xamal chiekal duilaliajwam Cristoliajwa. **20** Amwutjel xan nejxasinkax xamalxotaliajwan tajut chiekal jumchiliajwan. Jalape. Xan matabijs-enil, achax nejchaxoela-xaelen xamalliajwa.

### Amxot jum-aechprox Hagarliajwa, Saraliajwabej

**21** Xamal jum-am: “Moisés chajia lelpox naexaxisaxaes Dios nakbu'weliajwa” —am xamal. ¡Amwut chiekal xan nanaewe'e chiekal matabijaliajwam Moisés chajia lelpox! **22** Moisés chajia lelpox jum-aech Abraham kolenjepox paxulan. Matxoelapijin

nalaelton Agartat. Japow esclava-atow. Asan paxulan nalaeltpon Abraham pijowkolowtat. Japow pawel Sara. Japow Sara esclava-atowa-el. **23** Agar nafaena-el. Samata, piacha-el japow moejwaliajwa, naxuwlaliajwabej. Naxuwal wut, faenow paxuch, poich. Saralax nafaena. Pe Dios jumdut japow naxuwlaliajwa, paxuch faenaliajwapow, poich. Asamatkoi, Dios jumdutmatkoi pat wut, Sara naxuwal. Faenow paxuch, poich. **24-25** Agar pejwujajan, me-ama Moisés chajia lelpox, ja-aech. Moisés chajia lelpox naexasiti, japi, me-ama esclavos wut, ja-aechi, naexasiful xot japawujajan. Me-ama Agar, esclava, ja-aech japi jiw. Arabia tuajnuxot xabich pinjiyax mux, Sinaímux. Japamuxmatwujajat Dios jum-aech Moisésliajwa. Do jawux, baxael, Moisés kito'as japox lelaliajwa. Sara pejwujajanlax, me-ama Dios jumdutpox Abrahamliajwa. Ja-aech japawujajan, Sara esclava-el xot. **26** Xatis Jesucristo pejwujajan naexasich xot, me-ama Sara paxis wut, jatis, esclavos-esal xot. Samata, asamatkoi duilaxaes pomatkoicha Diosxotse, Dios pejpaklowaxxotse, pajel-paklowax, Jerusalén paklowaxxotse. **27** Dios pejjamechan, chajia lelpox, jum-aech wut, jum-aechox Saraliajwa:

“Xam nafaenam xot, xijimil. Pe nakiowa, nejchachaemilde xam boejtae-emilpowam yamxuchxaenkpox, nalaelsliajwa wut! Asamatkoi xabich chanoeyaxaelam, yamxuch boejpun wut nalaelsliajwa. Do baxael, asamatkoi, xabichaxael namojiw. Xam, me-ama namakow, jachiyaximil” —aechox Saraliajwa.

**28** Takoew, xamal, me-ama Abraham paxulan, Isaac wut, ja-am. Japon nalaeltpon Saraxot, Dios chajia jumduchpon Abrahamliajwa. Samata, xamalbej amwutjel Dios paxi wut, ja-am, Dios jumdut xot Abrahamliajwa. **29** Abraham paxulan, nalaeltpon Agarxot, japon taliat pakoewan pajaman, nalaeltpon Saraxot, Espíritu Santo jumduxat. Amwutjelbej, Moisés chajia lelpox naexasiti, xatis nakaliat, Jesús pejwujajan naexasichpis. **30** ¿Achaxkat jum-aech Dios pejjamechan, chajia lelpox, Dios jum-aech wut Abrahamliajwa? Jum-aechon: “Naxulan, namakowxot nalaeltpon, xam tupam wut nejew waelaximil japonxot. Puexa nejew waelaxaelam nijowkolowxot nalaeltponxot. Samata, jto'im namakow chijiyaliajwa xamxot, paxulan suapich!” —aech Dios Abrahamliajwa. **31** Takoew, xatis Diosliajwa, Abraham pamakow paxi wut, jachi-esal. Xatislax, Abraham pijowkolow paxi wut, jatis.

**Jesús pejwujajan naexasiti wewe'pa-esalpox  
naexasisliajwa Moisés chajia lelpox**

**5** Jesucristo tɔp nakwemosliajwa babijaxan isaspoxan Dios nakbɔ'weliawja. Samata, Moisés chajia lelpox kaes nakwewe'pa-el naexasisliawjas Dios nakbɔ'weliawja. Xatis, me-ama judíos, jachiyaxisal. Samata, wajut chiekal nejchaxoelaxaes: “Dios nakbɔ'weyaxael, Cristo tɔp xot. Samata, peme kaxadik nejchaxoelaxisal naexasisliawjas Moisés chajia lelpox” —chiyaxaes, wajut nejchaxoels wɔt.

**2** ;Xamal chiekal naewe'e xan lelpox! Nejchaxoelam wɔt, ;nabey nejchaxoele: “Xan kitapaeyaxaelen nacircuncidaliawja. Ja-an wɔt, Dios xan nabɔ'weyaxael” —nabey aeche', nejchaxoelam wɔt! Japox nejchaxoelam wɔt, diachwujajnakolaxa-el. Japox nejchaxoelam wɔt, pachaemaxil Cristo tɔppox cruztat xamal bɔ'weliawja. **3** Pejme lelaxaelen circuncidaxliawja. Jiw pajut kitapaei wɔt circuncidaliawjas, japi jiw chiekal naexasisaxaelbej puexa Moisés chajia lelpox, japi babijaxan ispoxanliawja Dios bɔ'weliawjas. **4** Xamal nejchaxoelam: “Moisés chajia lelpox xatis naexasisaxaes Dios nakbɔ'weliawja” —am xamal, nejchaxoelam wɔt. Ja-am wɔt, kofaxaelam naexasitampox Cristo pejwujajan Dios xamal bɔ'weliawja. Ja-am wɔt, xamal nejxasinkaximil Dios kajachawaesaxaelpox. **5** Xatis naexasich Jesucristo tɔppox cruztat nakbɔ'weliawja. Xatis chiekal matabijasbej Dios nakbɔ'weyaxaelpox. Samata, Espiritu Santo nakkajachawaesaxael piach wujajnewesliawjas that toepaxmatkoi. Japamatkoi pat wɔt, Dios kaenanɔla nakjɔmchiyaxael: “Xam babijaxan isampoxan ajil xanliawja” —chiyaxael Dios kaenanɔla xatisliawja. **6** Xatis, Jesucristo pejjiws, nakcircuncida wɔt, o, nakcircuncida-el wɔtbej, japox, koloeyax, Diosliawja chiekal najɔp. Kaes pejme pachaempox Diosliawja, Jesucristo chiekal xanaboejaspox. Jesucristo chiekal xanaboejas xot, nejxasinkas asew jiw. Samata, isasbej pachaempoxan japiiliawja.

**7** Xamal majt chiekal naexasitam Jesús pejwujajan. ;Achankat xamal to'a kofaliawjam naexasitampox Jesús pejwujajan, diachwujajnakolaxpox? **8** Dios xamal to'a-el kofaliawjam naexasitampox Jesús pejwujajan. Dios xamal tadɔt naexasisliawjam japawujajan. **9** Jiw jɔm-aech: “Pan isliawjas wɔt, cha-aelaxach lewadura tanialtas puexa pansap puthlaliawja” —aechi. Ja-aechlap-is

jiw babejchow. Kaesupich wut, japi xajup puexa jiw tabejsliajwa, naexasiti Jesús pejwujajan. **10** Xan Dios chiekal xanaboejtax xamal asax nejchaxoelasamatam, xatis chiekal kaenejchaxoelaxliajwas. Xamalxot kaen aton itsalt wut Cristo xanaboejampoxliajwa, japon aton Dios kastikaxaes. Japon aton, paklon wut, o, paklona-el wutbej, nakiowa, japon aton Dios kastikaxaes.

**11** Takoew, xamal judíos-emilpim, to'axaelen wut circuncidaliajwam, ja-an wut, judíos xan nanejweslaxil. Ja-an wutbej, xan judíos pijaxtat nabijasaxinil. Judíos xan nanejwesla, jiw naewujnax xot Cristo tupox cruztat xatis babijaxan isaspoخانliajwa. **12** Xan nejxasinkax xamalxot itsaltpi kamta nakolaliajwa, kaes xamal itsalsasamatapi.

**13** Takoew, Dios xamal tadut Jesucristo pejwujajan naexasisliajwam Dios xamal bə'weliawwa babijaxan isampoxanliajwa. Jesucristo pejwujajan naexasitam wut, nejchaxoelam wut, nabej nejchaxoele': "Amwutjel asax na-it-ele-el. Samata, babijaxan isasianpox isaxaelen" —nabej aeche', nejchaxoelam wut! ¡Asbuan jumch nakaewa chiekal nakajachawaesfulde, xabich nanejxasinkam xot! **14** Dios pejjamechan, chajia lelsopox, jum-aech wut, jum-aechox: "¡Xamal nejxasinkde asew jiw! Me-ama najut nanejxasinkam wut, ¡ja-amde asew jiwliajwa!" —aechox. Ja-am wut, kaewutje kamta naexasisaxaelam puexa Moisés chajia lelpoxbej. **15** ¡Najut chiekal taem nakaewa natoesasamatam! Xamal nakaewa nanejwesla wut, nakaewa najum-am wutbej babejjamechan, ja-am wut, asbuan jumch nakaewa natoesaxaelam Jesús pejjiwampim.

### **Espíritu Santo kajachawaechpox Jesús pejwujajan naexasiti chiekal duilaliajwa**

**16-17** Xatis babijaxan, wajut isasiaspoxan, japoxan Espiritu Santo nejxasinka-el. Espiritu Santo naktato'alpoxan pachaem xatis isliajwas. Pe xatis japoxan nejxasinka-esal isfulaliajwas. Espiritu Santo naktato'alpoxan xatis wajut xajupaxisal japoxan isliajwas. Samata, ipomatkoicha japoxan isfulde Dios pejkajachawaesaxtat, xamal najut isasiampoxan, babijaxan, isasamatam! **18** Isfulam wut Espiritu Santo tato'alpoxan, xamal kaes pejme nejchaxoelaximil: "Xan naexasisaxaelen Moisés chajia lelpox pejme chiekal pachaemaliajwan Diosliajwa" —chiyaximil, nejchaxoelam wut.

**19** Tampa xatis wajut chiekal matabijaliajwas, jiw babijaxan is wut. Poejiw asew watho' bu'moejt wut, pejwatho'a-elpi, japox pachaema-el Diosliajwa. **20** Ídolos kawuajnxan, japoxanbej pachaema-el Diosliajwa. Pinjoe'iw pinjoe'axtat ispoxan, japoxanbej pachaema-el Diosliajwa. Jiw nejwesla wut asew, japoxbej pachaema-el Diosliajwa. Jiw kaenejchaxoelaxa-el wut, jum-aech wutbejpi palaeyajamechan, japoxbej pachaema-el Diosliajwa. Jiw xabich uwmaenk wut, japoxbej pachaema-el Diosliajwa. Jiw xabich kamta palala wut, japoxbej pachaema-el Diosliajwa. Asew jiw kaesasia wuti, pejew wut, me-ama asew jiw, jachi-elasia wuti, japoxbej pachaema-el Diosliajwa. Jiw chanaekabuanaapoxtat asew jiw asbuana jumch nadija wut, japoxbej pachaema-el Diosliajwa. Jiw nadija wut kolemtjeliajwa, do jawux, jumchiyaxael wut babejjamechan nakaewa asamtjpijiwliajwa, japoxbej pachaema-el Diosliajwa. **21** Jiw kinusasiowal wut asew jiw, japoxbej pachaema-el Diosliajwa. Jiw saxa af wut saxsliajwas, japoxbej pachaema-el Diosliajwa. Jiw xabich xael wut, babijaxan is wutbej, japoxanbej pachaema-el Diosliajwa. Jiw is wutbej kaes asaxan babijaxan, japoxanbej pachaema-el Diosliajwa. Puexa japababijaxan ispi, japi jiw duilaxil Diosxotse. Majt xamal naewuajnxapox, japox pejme xamal naewuajnxax.

**22** Jesús pejuwajan naexasiti, japi jiw kajachawaesfulas Espíritu Santo. Samata, japi nejxasink asew jiw. Japibej xabich nejchachaemil. Japibej asew jiw suapich, chiekal duilaful. Japibej piach boejtaliasful palala-elaliajwa, asew jiw babijaxan is wut japiliajwa. Japibej asew jiw kajachawaet. Japibej jumduw wut asew jiwliajwa, japoxan chiekal isbejpi. **23** Japibej nejchaxoelael: “Xan kaes pejme pachaeman. Me-ama asew jiw jachi-enil” —chi-eli, nejchaxoel wut. Japibej pajut chiekal natataeful babijaxan isasiapoxan is-elaliajwa. Japilax isful pachaempoxan. Japoxan japi is, Espíritu Santo kajachawaesfulas xot. Samata, japi fias-esal is-elaliajwa pachaempoxan. **24** Jesucristo pejuwajan naexasiti nejchaxoel: “Jesús cruztat kimatamatlas wut, jawutbej tajax padujnejchaxoelax, cruztat matamatlas” —aechi, nejchaxoel wut. Samata, amwutjel padujnejchaxoelax japixot ajil, majt tato'laspoxan babijaxan isliajwa. **25** Amwutjel xatis Espíritu Santo nakkajachawaet xot, tapaeyaxaes japon naktato'laliajwa isliajwasbej japon nejxasinkpoxan.



**26** ¡Nabej nejchaxoelatis: “Xatis kaes pachaems. Me-ama asew jiw, jachi-esal” —nabej chitis, nejchaxoels wut! ¡Nakaewa nabej nataliastisbej na-uldüksliajwas! ¡Xatis nakaewa nabej nanusasiowlatisbej!

**Jesús pejwujajan naexasiti nakaewa  
nakajachawaesaxaelpox**

**6** Takoew, xamalxot Jesús pejwujajan naexasitpon, babijax is wut, ¡japon fia'e kofsliajwa japox babijax! ¡Japon naewujajande pejme isliajwa Dios nejxasinkpoxan! Naewujajnam wut, ¡chiekal naewujajande! ¡Ja-amde, kaes xamal naexasitam xot Espíritu Santo tato'alpox! ¡Xamalbej najut chiekal natataefulde babijax isasamatam! **2** Xamalxot Jesús pejwujajan naexasitpon xabich nabijat wut, ¡japon xamal kajachawa'e! Jamsumfulam wut, naexasisaxaelam Cristo tato'alpox.

**3** Aton, chiekal pachaema-elpon, pajutliajwa jum-aech wut: “Xan kaes pachaeman. Me-ama asew jiw, jachi-enil” —aech wuton, japon pajut naekichachajba, diachwujajnakolaxa-el xot. **4** Kaenanula jiw pajut chiekal nejchaxoelaxael: “Xan dukx wut, ¿bej ma-anbejkat Diosliajwa?” —chiyaxaeli, pajut nejchaxoel wut. Japi ispoxan pachaem wut, xabich nejchachaemlaxaeli. Ja-aech wut, pajutliajwa japi jiw jumchiyaxil: “Xan kaes pejme pachaeman. Me-ama asew jiw jachi-enil” —chiyaxili. **5** Samata, xamal kaenanula chiekal isfulaxaelam Dios tato'alpoxan.

**6** Aton xamal naewujajan wut Dios pejjamechan, japon aton xamal kajachawaesaxaelam nejewtat.

**7** ¡Xamal najut naekichachajbaximil! Chinax kaen aton xajupaxil naekichachajbaliajwa Dios. Jiw pejlulantat pelapi pachaem wut, asamatkoi jolaxaeli pachaempi. Pelax pachaema-el wut pelasi, ja-aech wut, asamatkoi jolaxisal, pelasi pachaema-el xot. **8** Jachiyaxaelbej jiw ispoxan. Jiw babijaxan is wut, pajut isasiapoxan, asamatkoi, japi jiw tup wut, pomatkoicha Dios kastikaxaespi. Aton isful wutlax Espíritu Santo tato'laspoxan, japon aton asamatkoi tup wut, pomatkoicha dukaxael Diosxotse. **9** Samata, xatis kofaxisal isfulaliajwas pachaempoxan. Damlaxisalbej isfulaliajwas Espíritu Santo naktato'alpoxan. Japoxan isfulas wut, Dios asamatkoi nakchaxduiyaxael pachaempoxan. **10** Samata, xatis xajups wut, puexa asew jiw kajachawaesaxaes. Pe kaes chiekal kajachawaesaxaes naexasiti Jesús pejwujajan.



**Pablo lelpox taxdukanaewuajna  
Gálatas paklowaxpijwliajwa**

**11** Xan, Pablo, amxot tajut lelx. Samata, xamal taeyaxaelam pinaletan. **12** Judíos to'a wut xamal circuncidaliajwam, japi japox to'a, nakaejudíos suapich, chiekal pachaemaliajwa, pejlwla xoti asew judíosliajwa. Japi judíos nejwesla nabijasliajwa, me-ama nabijatpi, japi jum-aechpi: “Dios nakbeltaen babijaxan isaspoxanliajwa, Cristo tuxot xot cruztat” —aechpi. **13** Xamal to'api circuncidaliajwam, japi pajut chiekal naexasis-el Moisés chajia lelpox. Asbuan jumch japi to'a xamal circuncidaliajwam. Ja-aech wut, japi jumchisia asew judíos jumtaeliajwas: “Xanal kito'ax xot, xabich Galacia tujnupijiw, japi judíos-elpi, circuncidaslisi. Samata, xanal kaes pejme xabich pachaeman” —chisiapi asbuan jumch, asew judíos sitaeliajwas. **14** Xan tajut jumchiyaxinil asew jiwliajwa: “Xan isxpoxan asew jiwliajwa xabich pachaem” —chiyaxinil. ¡El! Xanlax nejxasinkax asew jiw naewuajnalijwan wajpaklon Jesucristo cruztat tuxpoxkal. Xanliajwa Cristo cruztat tuxot, amwutjel nejxasinka-enil babijaxan isliajwan, me-ama ampathatpijw is babijaxan. Samata, xan ampathatpijwliajwa, xan, me-ama tuxwut, Jesucristo suapich, ja-an. **15** Poejiw circuncidaspi, o, poejiw circuncida-esalpibej, japoxan koloeyaxan, Diosliajwa chiekal najux. Kaes pejme pachaem, xatis pajelnejchaxoelaxan wuch, Jesús pejwujajan naexasich wut. Jatis wut, me-ama jelnalaelaspis wut, jatis Diosliajwa.

**16** Puexa xamal, chiekal duilampim, me-ama ampacartatat lelx wut, to'ax chiekal duilaliajwam, xan Dios kawuajna. Dios kawuajna xbej xamal beltaeliajwapon. Dios kawuajna xbej puexa asew jiwliajwa, japi diachwujnakolax Dios pejiwpi.

**17** Xan naewuajna xot Jesús pejwujajan, asew jiw pin-iaveces xabich naselt wut, namatwujxakolbala. Japawajelan jiw taen wut, pajut chiekal matabija xan Jesúsliajwa nabis-taxonan. Samata, xan kaes nejxasinka-enil asew jiw najumchiliajwa: “Pablo Jesúsliajwa nabistpona-el” —nachi-liajwa.

**18** Takoew, wajpaklon Jesucristo kawuajna puexa xamal kajachawaesliajwa. ¡Jasox nej ja-aech! xamalliajwa!